

26. januar 2015

UPA2015/57

Inatsisartut suleriaasianni § 33 naapertorlugu matumuuna Inatsisartunut aalajangiiffigisassatut siunnersuut imaattoq saqqummiuppara:

Meeqqanut suli atualersimangitsunut naleqquttumik Kullorsuarmi perorsaanikkut ineriartornissamut neqerooruteqalersinnaanermut tunngatil-lugu sanaartornikkut pisariaqartitsinerup misissuiffigneqarnissaanik Naalak-kersuisut peqquneqarnissaat pillugu Inatsisartut aalajangiiffigisassaattut siunnersuut. Misissuinermut ilaliullugu kommunimut pineqartumut inassuteqaatinik suliaqartoqartariaqarpoq, nammineq killiliussat iluanni pisariaqartitsinerup tamatuma naammassiniarneqarsinnaanera pillugu.
(Inatsisartunut ilaasortaq Hans Enoksen, Partii Naleraq)

Tungavilersuut:

Nunaqarfissuarmi Kullorsuarmi innuttaasut affaat sinnerlugit tassaapput meeqqat inuusut-tuaqqallu, meeqqanillu sullissineq isornarluinnartuulluni. Kullorsuarmi meeqqat inuusut-tuaqqallu 250-it missaanniipput.

Kullorsuarmi meeqqanut suli atuarlingitsunut paaqinnittarfeqangilaq, naak meeqqat ukiukinnerit amerlagaluaqisut, taamaattumillu saneqqutaaginnarneqarsin-naangilaq Kullorsuarmi ulluunerani paaqinnittarfiliornissaq, meeqqat pineqartut atualernissamut piareersarneqarnissaat kissaatigigaanni.

Meeqqanik isumaginninnermi Kullorsuarmi meerartaasut sumiginnarsimavagut, naak taakkua ukiut amerlasuut ingerlaneranni amerliartorsimagaluartut. Kommunip akisussaaffigaa meeqqat atuarlernissaat sioqqullugu perorsaanikkut ineriartornissamut periarfissaqarnissaannut neqerooruteqarnissaq, kisiannili aamma inatsisit atuuttut naapertorlugit tamatumunnga aamma Naalakkersuisut akisussaaffeqarput, ilaatigut Naalakkersuisut akisussaaffigaat meeqqat atuarlernisaat sioqqullugu perorsaanikkut ineriartornissamut periarfissaqartinneqar-nissaasa nakkutiginnissaat.

Taamaattumik Naalakkersuisut kommunimik pineqartumik suleqateqarnermik aallartitsisariaqarput, taamaaliornikkummi Naalakkersuisut kiisalu kommunip akisussaaffittik kivissinnaammassuk, Kullorsuarmi meeqqanut suli atualingitsunut perorsaanikkut naleqquttumik ineriartortitsiffiusumik neqerooruteqartoqarnissaa

eqqarsaatigalugu. Ingasattajaarnerunngilarmi kissaatigissallugu nunaqarfimmiut meerartaasa ineriartortinneqarnissaat illoqarfinni meeqqat ineriartortinneqarnerannut sanilliunneqarsinnaasumik.

Perorsaanikkut ineriartortitsiviusumik Kullorsuarmi meeqqanut tunngatillugu sullissinissaq aallunneqalerpat tamanna Kullorsuarmiut meerartaasa suli pitsaanerusumik ineriartornissaannut tunngaviusussat pilersinneqassapput.

Taamaattumik uanga neriutigaara Kullorsuarmiut meerartaat ukiukinnerusut pitsaanerusunik atugassaqartinneqalernissaat, Inatsisartullu ataatsimoorlutik suliniummik tapersersuinissaat, inassutigaaralu siunnersuutip akuersissutigineqarnissaa.

Pisortanut aningaasarsiornikkut allaffissornikkullu kingunerissai:

Nalilerneqarpoq siunnersuutip matuma akuersissutigineqarneratigut tamanna allaffissornikkut Namminersorlutik Oqartussanut AC-tut atorfilimmut aningaasartuutit kuvartiannik 125.000 kr.-nit missaannik aningaasartaqartumik kinguneqassasoq. Nalilerneqarpoq aningaasat pineqartut allaffissornikkut ingerlatsinerup ataatsimut iluani aningaasaliissutini tulleriiaarinikkut pissarsiarineqassasut.

Namminersortumik ingerlatsisunut aningaasarsiornikkut allaffissornikkullu kingunerisassai:

Siunnersuutip matuma akuersissutigineqarnera aningaasarsiornikkut allaffissornikkullu namminersorlutik inuussutissarsiortunut kinguneqassanngilaq.